

Udin, ai 30 di Zenâr dal 2015

Dute la produzion teatrâl in marilenghe di Gianni Gregoricchio in curt online sul sît de ARLeF

Un grant patrimoni a disposizion gratuite dai furlans e des compagniis teatrâls

La Agenzie Regjonâl pe Lenghe Furlane (ARLeF), in ocasion dal otâf aniversari de muart di Gianni Gregoricchio (1927-2007), si impegne a publicâ sul so sît internet (www.arlef.it) dute la produzion teatrâl in marilenghe dal grant comediograf. La decision e je stade cjapade intun incuintri jenfri il president de ARLeF, Lorenzo Fabbro, e la famee di Gianni Gregoricchio, te persone de fie Francesca. **L'obietîf al è chel di meti adun la sioe produzion teatrâl, rindintle fruibile, di podê discjamâ e consultâ in maniere facile e gratuite, di bande di ducj i interessâts**, prime di dut lis compagniis teatrâls che, ancjemò vuê, a metin in sene lis sôs comediis inconfondibilis.

«*O vin aderît cun entusiasim ae propueste di Francesca – al spieghè il president de ARLeF -, parcè che o stimin che i 14 tescj pal teatri di Gianni a sein un patrimoni impuartant pe culture furlane*».

La ARLeF e previôt di istituî dentri dal so sît istituzionâl, za siôr di contignûts multimediâi, didactics e culturâi, une sezion dedicade ae figure dal inteletuâl furlan, cressint cussì la sô visibilitât e e valorizantle ancjemò di plui. Sarâ une sezion articolade, in linie cu lis azions di promozion de politiche linguistiche furlane, di simpri tra lis prioritâts de Agenzie.

«*Gno pari al sarès stât entusiast, o soi sigure – e declare Francesca Gregoricchio -, propit parcè che al pensave che il teatri al fos une robe di ducj, e al è par ducj che Gianni al à scrit e lu à fat di inovadôr cun fidance inestinguibile pal public e te lenghe che al amave tant, il furlan*».

La condivision on line no sarès stade pussibile cence la colaborazion de Associazione Teatrale Friulana (ATF) e di Gianni Cianchi in particolâr che, cun grande cure, al à metût adun dutis lis comediis di Gianni Gregoricchio tal libri “Gianni Gregoricchio. Teatro” e che cumò indi à autorizade la publicazion.